

# Tarnimikkut Nappaatillit Maalaarutaannik Aalajangiisartut suleriaasiat pillugu Namminersorlutik Oqartussat nalunaarutaat

Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni nr. 11-mi, 12. juni 2019-imeersumi § 48, imm. 4, naapertorlugu aalajangersarneqarput:

## Kapitali 1

### *Tarnimikkut Nappaatillit Maalaarutaannik Aalajangiisartuni suliassani illuatungeriit*

§ 1. Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 46 naapertorlugu Peqqinnissamut Naalakkersuisoq maalaarutunut aalajangiisartunik ima taaguutilimmik pilersitsissaaq: Tarnimikkut Nappaatillit Maalaarutaannik Aalajangiisartut.

§ 2. Tarnimikkut Nappaatillit Maalaarutaannik Aalajangiisartuni suliassani illuatungeriit tassaapput napparsimasoq napparsimmavimmilu oqartussaasut.

*Imm. 2.* Peqqinnissaqarfimmi inuit sukumiinerusumik taaneqartut naammagittaalliutigineqarpata peqqinnissaqarfimmi inuit pineqartut suliassami peqataasutut aamma isigineqarsinnaapput.

## Kapitali 2

### *Suliassat piareersarneqartarnerat*

§ 3. Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 47 naapertorlugu napparsimmavimmi oqartussaasut napparsimasumit napparsimasunulluunniit siunnersortimit noqqaassuteqartoqareerneratigut suliassaq Tarnimikkut Nappaatillit Maalaarutaannik Aalajangiisartunut tunniunneqassaaq.

*Imm. 2.* Napparsimasoq siunnersortaalu Tarnimikkut Nappaatillit Maalaarutaannik Aalajangiisartunut toqqaannartumik suliakkiisinnaapputtaaq.

§ 4. Suliap tiguneqarnerani aalajangiisartut siulittaasuata naammagittaalliut aalajangiisartut piginnaasaasa iluaniinnersoq aalajangiivigissavaa.

*Imm. 2.* Naammagittaalliut aalajangiisartut piginnaaneqarfisa avataanniittoq qularutissaanngippat, siulittaasup oqartussanut suliarinnettussanut eqqortunut ingerlateqqissavaa, illuatungeriillu

tamatuminnga ilisimatillugit. Pisuni allani apeqquq Tarnimikkut Nappaatillit Maalaarutaannik Aalajangiisartunit suliarineqassaaq.

**§ 5.** Suliassap tiguneqarnerani Tarnimikkut Nappaatillit Maalaarutaannik Aalajangiisartut siulittaasuata paasissutissat pisariaqartinneqartut ilanngullugit nassiunneqarsimanersut nakkutigissavaa, tassunga ilanngullugit:

- 1) suut naammagittaalliuutigineqarnerannik oqaatiginninneq,
- 2) pinngitsaaliisummik iliuuseqarnermik nalunaarsuiffup assilinera,
- 3) nakorsaanermit katsorsaanermit akisussaasumit nalunaarut aamma
- 4) katsorsaanissamut pilersaarut.

*Imm. 2.* Napparsimasup siunnersortaataluunniit naammagittaalliuut Tarnimikkut Nappaatillit Maalaarutaannik Aalajangiisartunit toqqaannartumik suliakkiutigippagu, aalajangiisartut siulittaasuata napparsimmavimmi oqartussat, Peqqinnissamut Aqutsisoqarfik ilanngullugu naammagittaalliuut pillugu nalunaarfigissavai tamatumalu peqatigisaanik Peqqinnissamut Aqutsisoqarfik imm. 1 naapertorlugu paasissutissanik pisariaqartinneqartunik nassiusseqqullugu qinnuigissallugu.

*Imm. 3.* Aalajangiisartut siulittaasuata suliap paasissutissiissutaanissaa, pisariaqarpallu nalunaarutiniq assigisaannillu allanik pissarsiniarnissaaq aamma aalajangiivigissavaa.

**§ 6.** Tarnimikkut Nappaatillit Maalaarutaannik Aalajangiisartut imaluunniit tassani ilaasortat arlaata aalajangiisartunit piginnaatinneqartup, suliamik aalajangersimasumik suliaqarnermut atatillugu Dronning Ingridip Napparsimmavissuani tarnimikkut nappaatilinnut immikkoortortaqarfik misissuiffigisinnaavaat.

### **Kapitali 3**

#### *Ataatsimiittarnerit*

**§ 7.** Siulittaasuusup Tarnimikkut Nappaatillit Maalaarutaannik Aalajangiisartut ataatsimiinnissaasa qaqugu sumilu pinissaat aalajangissavaa, ataatsimiinnernilu aqutsisuussalluni.

*Imm. 2.* Siulittaasumit allamik isumaqatigiissuteqartoqarsimanngippat Dronning Ingridip Napparsimmavissuani tarnimikkut nappaatilinnut immikkoortortaqarfimmi aalajangiisartut ataatsimiissapput.

*Imm. 3.* Suliat immikkut nukingiuttarillit, tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 41, imm. 3, naapertorlugu nalinginnaasumik pinngitsaaliisummik iliuuseqarnissap kinguartinneqarneranik kinguneqartartut, ilaatigut pinngitsaaliisummik katsorsartinnissaaq pillugu aalajangiinernut naammagittaalliuutit, suliassanit allanit siulliullugit suliarineqarnissaat, siulittaasumit aalajangiivigineqarsinnaapput.

*Imm. 4.* Napparsimasooq, napparsimasumut siunnersorti, napparsimmavimmi oqartussat, nakorsaaneq pineqartoq peqqinnissakkullu sullissisut akuusuujunnartut allat, suliap pineqartup Tarnimikkut Nappaatillit Maalaarutaannik Aalajangiisartunit qaqugu sumilu ataatsimiissutaanissaa pillugu ilisimatinneqassapput.

**§ 8.** Napparsimasumut siunnersorti naammagittaalliuutip Tarnimikkut Nappaatillit Maalaarutaannik Aalajangiisartunit oqaluuserineqarnerani tarnimikkut nappaatilinnik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 35, imm. 3, nr. 3 naapertorlugu sapinngisamik peqataatinneqassaaq. Tamanna aamma nakorsamut pinngitsaaliisummik iliuuseqarnermik aalajangiisumut naammagittaalliuutigineqartumut atuuppoq.

*Imm. 2.* Tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 48, imm. 2, naapertorlugu napparsimasup siunnersortaatalu oqaatsitigut imal. peqqinnissaqarfiup qarasaasiakkut attaveqaataa atorlugu, aalajangiisartunut suliamik saqqummiussinissaq pisinnaatitaaffigaat. Peqqinnissaqarfiup sinniisai, tarnimikkut nappaatilinnut nakorsaaneq pisumut attuumassuteqartoq, peqqinnissakkullu sullissisut pisumut akuusuujunnartut allat taamatulli pisinnaatitaaffeqarput.

*Imm. 3.* Immikkut ittunik pisoqartillugu napparsimasup peqqissusaanut imal. suliap aalajangiisartuni suliarineqarnissaanut pingaaruteqarpat, tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 48, imm. 2, nr. 2 naapertorlugu napparsimasup isumaqatigiinniarnermi tamakkiisumik ilaannakortumilluunniit peqataatinneqannginnissaa, aalajangiisartut aalajangiivigisinnaavaat.

**§ 9.** Tarnimikkut Nappaatillit Maalaarutaannik Aalajangiisartut ataatsimiinneri tamanut ammasuunngillat.

#### **Kapitali 4**

##### *Aalajangiisarnerit il.il.*

**§ 10.** Pinngitsaaliisummik katsorsartinneq, napparsimmavimmiillu angerlareernermi pinngitsaaliisummik malittarineqarneq pillugit naammagittaalliuutinut pinngitsaaliisummik iliuuseqarnissamik kingumoortumik sunniuteqartunut, tarnimikkut napparsimasunik nammineersinnaajunnaarsitsisarneq allatigullu pinngitsaaliisummik iliuuseqartarneq pillugit Inatsisartut inatsisaanni § 48, imm. 3, naapertorlugu, naammagittaalliuutit tiguneqarneranniit ulluinnaat arfineq-marluk qaangiutsinnagit, Tarnimikkut Nappaatillit Maalaarutaannik Aalajangiisartut aalajangiissapput.

*Imm. 2.* Suliani allani Tarnimikkut Nappaatillit Maalaarutaannik Aalajangiisartut sapinngisaq tamaat piaartumik aalajangiissapput. Naammagittaalliuutip aalajangiisartunit tiguneqarneraniit ullut 14-it qaangiunneranni naammagittaalliuut sulii aalajangiivigineqarsimanngippat, aalajangiisartut napparsimasooq siunnersortaalu tamassumunnga pissutaasumik, qaqugulu aalajangiisoqarnissaata naatsorsuutigineqarsinnaaneranik ilisimatissavai.

**§ 11.** Tarnimikkut Nappaatillit Maalaarutaannik Aalajangiisartut oqaloqatigiinnikkut nalilersuereernermi taasinikkut amerlanerussuteqarneq tunngavigalugu aalajangiisarput.

*Imm. 2.* Aalajangiineq aalajangiinernut nalunaarsuiffimmut allanneqassaaq. Aalajangiisartuni ilaasortaq isummaminut tunngavilersuutiminik nalunaarsuiffimmut naatsumik ilanngussisoqarnissaanik piumasaqarsinnaavoq.

*Imm. 3.* Tarnimikkut Nappaatillit Maalaarutaannik Aalajangiisartut aalajangigaat tunngavilersukkat, aalajangiisartut tamakkerlutik imaluunniit amerlanerussuteqartut isumaqatigiissutigineraat,

allaganngorlugit suliarineqassapput. Aalajangiisartut aalajangigaat siulittaasumit imaluunniit tassannga piginnaatinneqartumit atsiorneqassapput.

**§ 12.** Tarnimikkut Nappaatillit Maalaarutaannik Aalajangiisartut aalajangigaat illuatungeriinnut nassiunneqassapput.

*Imm. 2.* Napparsimasunut siunnersorti pisariaqartitsineq naapertorlugu Tarnimikkut Nappaatillit Maalaarutaannik Aalajangiisartunit aalajangiinerup paasissutissiissutigineqarneranut ikiutissaaq.

**§ 13.** Tarnimikkut Nappaatillit Maalaarutaannik Aalajangiisartut aalajangigaat tassaasinnaapput pinngitsaaliissummik iliuuseqarnermik akuersineq imaluunniit iliuuseqarnerup eqqunnginneranik naliliineq.

*Imm. 2.* Pinngitsaaliissummik katsorsaanissamik aalajangiinermik naammagittaalliuteqarnermi, aalajangiisartut aalajangiineq akuerisinnaavaat itigartissinnaalluguluunniit. Nakorsaasiinermut annertussusiliinermullu aalajangersimasumut naammagittaalliuteqarnermut tunngassuteqarpat, tamatumunngattaq aamma atuuppoq. Taamaattoq Tarnimikkut Nappaatillit Maalaarutaannik Aalajangiisartut nakorsaammik allamik imaluunniit annertussutsimik allamik innersuussisinnanngillat.

*Imm. 3.* Naammagittaalliut peqqinnissakkut sullissisumuttaaq/sullissisunuttaaq pinngitsaaliissummumut naammagittaalliutigineqartumut akuusimasumut tunngassuteqarpat, pineqartut isornartorsiorneqarnissaannut tunngavissaqarnersoq, Tarnimikkut Nappaatillit Maalaarutaannik Aalajangiisartut naliliivigissavaat.

**§ 14.** Tarnimikkut Nappaatillit Maalaarutaannik Aalajangiisartut suliatik pillugit nalunaarummik ukiut tamaasa tamanut saqqummiussissapput.

*Imm. 2.* Ukiumoortumik nalunaarut Dronning Ingridip Napparsimmavissuani tarnimikkut nappaatilinnut immikkoortorta qarfik suleqatigalugu suliarineqassaaq.

*Imm. 3.* Imm. 2 naapertorlugu ukiumoortumik nalunaarut kingusinnerpaamik tamanut saqqummiunneqarnerani Peqqinnissamut Naalakkersuisoqarfimmut nassiunneqassaaq.

## **Kapitali 5**

*Naammagittaalliuteqarsinnaaneq, naammagittaalliornissamut ilitersuut eqqartuussivimmullu saqqummiussineq*

**§ 15.** Tarnimikkut Nappaatillit Maalaarutaannik Aalajangiisartut napparsimasoq siunnersortaalu Kalaallit Nunaanni eqqartuussisarneq pillugu inatsimmi kapitali 28 naapertorlugu, eqqartuussivimmi aalajangiivigineqarsinnaanera pillugu ilitersussavaat.

*Imm. 2.* Tarnimikkut Nappaatillit Maalaarutaannik Aalajangiisartut napparsimasoq napparsimasumullu siunnersorti aamma ilisimatissavaat suliap aalajangiisartunit eqqartuussivimmut tunniunneqarnissaa, napparsimasoq eqqartuussissuserisumik eqqartuussivimmit illersuisulernerneqassasoq pineqartoq nammineerluni eqqartuussissuserisussarsisimanngippat.

**§ 16.** Aalajangiinernik eqqartuussivimmut saqqummiussineq noqqaassuteqarnerup saqqummiunneqarneranit ulluinnaat tallimat qaangiutsinnagit pissaaq.

## **Kapitali 6**

*Nipangiussimasussaataaneq*

**§ 17.** Tarnimikkut Nappaatillit Maalaarutaannik Aalajangiisartut nipangiussisussaataapput.

## **Kapitali 7**

*Atuutilersitsinermut atorunnaarsitsinermullu aalajangersakkat*

**§ 18.** Nalunaarut 26. april 2024-mi atuutilerpoq.

*Imm. 2.* Tamanna ilutigalugu Tarnimikkut Nappaatillit Maalaarutaannik Aalajangiisartut suleriaasiat pillugu Namminersorlutik Oqartussat nalunaarutaat nr. 15, 2. december 2013-meersoq atorunnaarsinneqarpoq.

*Namminersorlutik Oqartussat, ulloq 23. april 2024*

**Agathe Fontain (atsior.)**

Peqqissutsimut Naalakkersuisoq

/ Nike Berthelsen (atsior.)

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

